
Saksnr: 2021/2254-1
Saksbehandlar: Ida-Beate Mølmesdal
Dato: 25.01.2021

Til: Vestland Ungdomsutval

Frå: Fylkesrådmannen

Informasjon om planprosess - klimaplan


Arbeidet med ny regional plan for klima har starta opp, og dette dokumentet er meint som eit informasjonsnotat til Vestland ungdomsutval for å orientere om at prosessen er i gang.

Bakgrunn for arbeidet

Utviklingsplan for Vestland¹ er vedtatt og Vestland fylkeskommune skal starte arbeidet med ein regional plan etter plan- og bygningslova (PBL 2008). Planprosessen skal ende med ein plan som synleggjer korleis vi i Vestland skal jobbe for å legge klima og miljø som premiss for samfunnsutviklinga, samt følge opp tilhøyrande strategiar. Utviklingsplanen legg også nokre føringar for korleis ein regional planprosess skal gjennomførast i Vestland, både framdrift, organisering og medverknad.

Planarbeid i Vestland er inndelt i fem hovudfasar:

- **Utarbeiding og høyring av planprogram**
- Utarbeiding av planforslag
- Høyring og offentleg ettersyn
- Vedtaksfase fram til vedtak i fylkestinget
- Gjennomføringsfase



Vi jobbar no med denne fasen

Dette notatet er ei orientering til Vestland ungdomsutval og meint som eit fyrste dokument for å kople utvalet på arbeidet. Vi vil i hovudsak fokusere på fyrste fase - *planprogramfasen (fase 1)*. Heile planprosessen vil følge framdrift som skildra i utviklingsplanen, med vedtak av planen og handlingsprogram innan 2 år. Organiseringa av arbeidet tek utgangspunkt i hovudprinsippa om enkel organisering, bruk av eksisterande organ der mogeleg, samt sikre brei medverknad i sektorovergrepande tema. I utviklingsplanen vert det skildra at oppstartsfasen kan vere enklare organisert enn planfasen (s. 43).

Kvifor lagar vi eit planprogram?

Krav om planprogram gjeld for alle regionale planar etter plan- og bygningslova, som denne planen er. Som eit minimum skal planprogrammet forklare kvifor vi skal gjennomføre dette planarbeidet og kva vi ynskjer å oppnå, vi skal skildre kva vi tenkjer å gjere i planprosessen, og korleis vi skal organiserer medverknadsprosessen. Eit planprogram er ei «oppskrift» eller «plan» for planlegginga, både på innhald og prosess.


Kva vi har gjort til no

¹ [Utviklingsplan for Vestland](#)

- Det er etablert ei intern arbeidsgruppe som har som oppgåve å produsere eit planprogram på ein effektiv og god måte. Det er ikkje planlagt store eksterne medverknadsprosessar før planprogrammet vert lagt ut på offentleg høyring.
- Arbeidsgruppa jobbar for å få ei oversikt over tilgjengeleg kunnskap for å skaffe ei oversikt over kunnskapsgrunnlaget som grunnlag for å diskutere overordna tema. Samstundes ser vi etter behov for nye utgreiingar. 2020-2030 vert ofte omtalt som «handlingens tiår», så vi ynskjer å bruke mest tid på den delen av planane som inkluderer handling, altså mål og tiltak.
- Arbeidsgruppa har gjennomført to møte med enkel evaluering av gjeldande klimaplanar i frå Hordaland og Sogn og Fjordane. Eitt møte saman med Statsforvaltaren (gamle Fylkesmannen i Vestland) og eitt møte internt i klimaseksjonane i fylkeskommunen. Dette har vore ein arena for å løfte fram dei gode delane av tidlegare arbeid, kva vi har vore mindre gode på, og dialog om vegen vidare.
- Hausten 2020 samarbeida Statsforvaltaren og stabsavdeling for strategisk utvikling og digitalisering (i VLFK) om å gjennomføre ei undersøking ute i kommunane. Dette var fyrste aktivitet knytt til planprosessen. Vi spurte om kva planar dei hadde for å lage egne nye klimaplanar, samt kva tema dei trengte mest rettleiing på frå Statsforvaltaren og fylkeskommunen. Dette gav god oversikt over planane i kommunane, samt betre oversikt over tilpassing av fylkeskommunen sin planprosess til kommunane sine prosessar.
- Det er etablert ei eiga [nettside for klimaplanarbeidet](#). Denne sida vil bli oppdatert kontinuerleg etter kvart som planprosessen får meir fastsette rammer og politiske vedtak. Nettsida inkluderer to viktige punkt per i dag:
 - Klimadashbord som gir oversikt over klimagassutsleppa i Vestland, også på kommunenivå. Dette kan vere ein ressurs for kommunane i sitt arbeid.
 - Enkel [spørjeundersøking](#) om kva Vestlandssamfunnet meiner er viktige tema for ein ny klimaplan. Vi oppmodar alle til å fylle inn kva dei meiner er viktige tema. **Del gjerne** med dykkar kontaktar også.

Framdriftsplan for utarbeiding av planprogrammet

Planprosessen legg den overordna strukturen som er naudsynt for å nå måla i utviklingsplanen. Vi riggar no det grønne lokomotivet. Dei politiske visjonane skal operasjonaliserast, og vi må legge strukturane for å korleis vi skal arbeide med samfunnsutviklinga vidare. Planprogramfasen følger denne skissa for framdrift. Fylkesutvalet får utkast til planprogram til handsaming 20. april, og avgjer då om dei legg dette ut på høyring.



Vestland Ungdomsutval vidare i planprosessen

Arbeidet med ein regional plan som skal ta for seg klimautfordringane kan vere spesielt interessant for ungdomsutvalet å delta i, då det er dykkar generasjon som vert sittande att med dei fleste konsekvensane av dagens tiltak, eller manglande tiltak. Vi ynskjer å ha eit godt samarbeid og dialog med framtidens nullutsleppsgenerasjon og ynskjer å nytte dette utvalet i prosessen.

Vestland Ungdomsutval har møte i 19. mars, og i dette møtet vil de få ei ny politisk sak.

Vi ynskjer at det til den tid vert vurdert kva utvalet ser på som hovudutfordringane framover frå dykkar ståstad. Kva tema bør planen inkludere og kva ynskjer utvalet at resultatet skal munne ut i. Desse innspela ynskjer vi å inkludere for å utforme høyringsutkastet til planprogrammet til møtet 20. april.

Mål i utviklingsplanen og FN sine berekraftsmål

Utviklingsplan for Vestland set rammene for arbeidet vidare. Mål 2 seier at vi i Vestland skal legge klima og miljø som premiss for samfunnsutviklinga. Det er samstundes nautsynt at vi ser på alle dei fire måla i utviklingsplanen og FN sine berekraftsmål.

Klimaplanen vil ta utgangspunkt i miljødimensjonen av berekraft, men samstundes ta omsyn til dei resterande dimensjonane (sosial og økonomisk). Tre viktige berekraftsmål vil vere å stoppe klimaendringane (13), ivareta livet på land (14) og livet på land (15).



Mål 2

Klima og miljø som premiss for samfunnsutvikling

Strategiar:

- 2.1 Vestland skal vere ein pådrivar for klimaomstilling og nullutslepp innan 2030.
- 2.2 Vestland skal sikre infrastruktur og forvalte viktige natur-, landskaps- og kulturverdiar.
- 2.3 Vestland skal bidra til å nå klima- og miljømåla gjennom offentlege innkjøp.